



ANDONI CANELLADA / ARGAZKI PRESS

Abaltzisketa, Txindokiren magalean. Herri txikia da, eta populazioa mantentzeko arazoak ditu.

Abaltzisketaren pizgarri

LANGA PROGRAMA. Udalak populazioaren beherakadari aurre egiteko abian jarri duen ekimenaren barruan, teknologia berriei lotutako Logika enpresa da ardatza

Ainara Arratibel | **ABALTZISKETA**

Asko dira gaur egun Euskal Herrian dauden herri txikiak. Herri horiek izaten duten arazo nagusia, populazioaren galera izan ohi da. Gazte askok nahiago izaten dute herri handietara joatea, han zerbitzu eta bizitzeko erraztasun handiagoak dituztelakoan. Herri txiki horietako udalak gogor ari dira lanean herriaren etorkizuna baldintzatzen duen arazo horri aurre egiteko, eta asko dira abian jarri dituzten proiektuak. Horietako bat Abaltzisketako Udalak bultzatutako Langa programa da.

Abaltzisketa Gipuzkoako 88 herrien artean txikienetako bat da. Txindokiren magalean kokatua dago, Zaldibiatik eta Amezketatik gertu. Gaur egun 250 biztanle inguru ditu, baina garai batean 550 izatera ere iritsi zen. Populazioaren beherakada aspalditik datorren zerbait da. Horretaz oharturik, udalak herria biziberritzeko hainbat ekimen jarri zituen martxan duela hamarkada batzuk. Horri esker, azpiegiturak berritu ziren. Hala ere, zerbait gehiago behar zen, eta horretarako Langa proiektua jarri zuten abian duela urte batzuk. Eki-



ANDONI CANELLADA / ARGAZKI PRESS

Iñaki Gorostidi eta Jose Luis Murua, Logika enpresaren arduradunak.

men horren barruan proiektu ugari jarri zituzten martxan, aipagarrienak, hala ere, hiru izan ziren: haurrentzako eskolaren sorrera, aterpetxearen eraikuntza eta kultur etxearen biziberritzea.

Baina gazteak herrian gera zitezen ezinbestekoa zen lanpostuak sortzea, eta horretarako Logika enpresa eratu zuten. Iñaki Gorostidi abaltzisketarra izan zen bultzatzailea: «Filologia ikasketak amaitu berriak nituen. Itzultzaile gisa lan egin nahi nuen, baina lanik aurkitzen ez nuela ikusita, udalari

beka bat eskatu nion nire proiektuak gauzatu ahal izateko. Handik gutxira jabetu nintzen, egokia litzatekeela teknologia berriei lotutako enpresa bat sortu eta herriari bultzada bat ematea. Horrela Logika enpresa sortu zen», dio Gorostidik.

Hasiera batean itzulpenak egiteko proiektu bat zena, gaur egun 21 langilez osatutako elkarte anonimo bat da: Logika. Enpresa dinamizatzailea da, eta bere langile guztiak Abaltzisketa eta inguruko herri txikietakoak dira».

Hiru dira enpresak eskaintzen dituen zerbitzuak: itzulpen-gintza, telefono bidezko marketina eta digitalizazioa.

«Euskarazko, ingelesezko, frantsesezko eta gaztelaniazko itzulpenak egiten ditugu. Normalean bi pertsona aritzen gara lanean, baina lan handia egon den garaietan bost lagun ere egon izan gara», dio itzulpen-gintza zerbitzuko buru eta Logika enpresako arduradunetako bat den Luis Mari Muruak. Mota guztietako testuak itzulpen dituzte, eta normalean zerbitzu hau eskatzen duten enpresak digitalizazio edo telefono bidezko marketin zerbitzua eskatzen dutenak baino txikiagoak dira.

Telefono bidezko marketina da, hala ere, enpresaren zerbitzu nagusia. Bertan 16 lagun inguru dago lanean: «Deiak egin eta jasotzeko kontratatzen gaituzte. Inkestak eta telefono bidezko salmenta zuzena egiten ditugu, besteak beste», dio Gorostidik. Zerbitzu horretako bezeroen artean daude Gipuzkoako Foru Aldundia eta Euskaltel.

Logikak eskaintzen duen azken zerbitzua, digitalizazioarena izango litzateke. «Paperean dagoena formatu informatikora pasa, eta datu baseetan

LANGA PROGRAMA

Herria biziberritzea helburu duen programa

Udalak abian jarritako proiektuan hainbat ekimen bultzatu dira.

Aterpetxea: aterpetxe berria eraiki dute.

Kultur etxea: kultur etxeari bultzada eman zaio.

Eskola: nahiz eta Amezketako ikastetxearen menpe egon, haurrentzako eskola izatea lortu dute.

Enpresak: lanpostuak sortzeko, Logika enpresa jarri zen abian.

ENPRESA

Gazteak herrian gera zitezen ezinbestekoa zen lanpostuak sortzea, eta horretarako Logika enpresa eratu zuten

ESKOLA

Etorkizunean Langaren erronka nagusia eskola propioa izatea da, egungoa Amezketaren menpe baitago

integratzen dugu», azaltzen du Muruak.

Zabaltzea helburu

Hiru zerbitzuek harrera «bikaina» izan dute, eta asko dira zerbitzu bat eskatu, eta gero beste bietarako ere kontratatzen dituztenak.

Geroz eta bezero gehiago dituztela kontuan hartuta, Logika beste egoitza bat zabaltzekotan da Sopuertan (Bizkaian). Bertan Enkartzioetako lau lagun ariko dira lanean, eta batez ere digitalizazio zerbitzua eskainiko da: «Hango bezero gehienek zerbitzu hori eskatzen digute; beraz, egokia iruditu zaigu han jartzea», dio Gorostidik.

Orain arte izan dituzten bezero guztiak Hego Euskal Herrikoak izan dira, baina etorkizunean Ipar Euskal Herrira iristea ere gustatuko litzaieke: «Euskal Herri osoan zabaltzea gustatuko litzaiguke», azpimarratzen dute Gorostidi eta Muruak.

Azken urteetan Abaltzisketako populazioa mantendu da; beraz, hasierako helburua bete da. Hala ere, populazioak gora egitea gustatuko litzaieke. Hori lortzeko udala gogor ari da lanean, eta etxebizitzak eraikitzen ari da herriko gazteentzat. Etorkizunean Langak duen erronka nagusia Abaltzisketako eskola propioa izatea da, gaur egun Amezketaren menpe baitago.